

BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM
Broj:o4-o11-97/98
Sarajevo,26.11.1998.godine

Z A P I S N I K

1. sjednice Predstavničkog doma Parlamentarne skupštine Bosne i Hercegovine, održane 26. novembra 1998. godine

Sjednica je počela u 12 sati.

Sjednicom je predsjedavao Halid Genjac, predsjedavajući Predstavničkog doma Parlamentarne skupštine Bosne i Hercegovine.

Predsjedavajući je konstatovao da je prisutno ukupno 40 poslanika, 26 sa teritorija Federacije Bosne i Hercegovine i 14 sa teritorija Republike Srpske, i da, prema tome, postoji kvorum za pravovaljano odlučivanje na današnjoj sjednici Predstavničkog doma.

Pozdravljajući je naglasio da sjednici, pored poslanika, prisustvuju i: Živko Radišić, predsjedavajući Predsjedništva BiH; Alija Izetbegović i Ante Jelavić članovi Predsjedništva BiH; kopredsjedavajući i članovi Vijeća ministara BiH; ambasador Carlos Westendorp, Visoki predstavnik UN za Bosnu i Hercegovinu; ambasador Hans Šumaher, zamjenik Visokog predstavnika; predstavnici OSCE Misije za Bosnu i Hercegovinu; članovi diplomatskog kora u Bosni i Hercegovini i predstavnici sredstava informisanja.

Nakon pozdravljanja prisutnih, predsjedavajući je predložio slijedeći

D N E V N I R E D

1. Izbor Verifikacione komisije
2. Verifikacija mandata izabranih poslanika
3. Davanja svećane izjave
4. Izbor predsjedavajućeg i dvojice zamjenika predsjedavajućeg Predstavničkog doma Parlamentarne skupštine Bosne i Hercegovine.

Javnim glasanjem prisutnih poslanika, Predstavnički dom je jednoglasno usvojio predloženi dnevni red.

AD-1

Izbor Verifikacione komisije

Za članove Verifikacione komisije predloženi su slijedeći poslanici: Alma Čolo, Jozo Leutar, Miodrag Deretić, Ivo Divković i Nikola Špirić.

Prisutni poslanici su se jednoglasno izjasnili za predloženi sastav Verifikacione komisije.

Nakon konstatacije da je izabrana Verifikaciona komisija, predsjedavajući je proglasio pauzu radi održavanja sjednice Verifikacione komisije.

AD-2.

Verifikacija mandata izabranih poslanika

Izvještaj sa održane sjednice Verifikacione komisije podnijela je Alma Čolo u svojstvu predsjednika Verifikacione komisije.

Prema tom izvještaju, Verifikaciona komisija predlaže verifikaciju mandata slijedećim poslanicima:

1. Sa teritorije Federacije BiH

- iz Koalicije za cjelovitu i demokratsku Bosnu i Hercegovinu (SDA, GDS BiH, Liberalna stranka BiH i Stranka za BiH):

Alagić Raifa, Bičakčić Edhem, Branković Nedžad, Čaršimamović Tarik, Čolo Alma, Filipović Mediha, Genjac Halid, Jahić Adnan, Kadić Rasim, Neimarlija Hilmo, Oručević Safet, Pamuk Mustafa, Silajdžić Haris, Spahić Ibrahim.

- Iz Socijaldemokratske partije BiH:

Bogić Bogićević, Lagumdžija Zlatko, Mijačević Ivo, Muminagić Suada.

- Iz Socijaldemokrata BiH

Divković Ivo, Tokić Sejfudin.

- Iz Hrvatske demokratske zajednice:

Havel Ana, Leutar Jozo, Pašalić -Lhotak Ivica, Prlić Jadranko, Skopljak Pero, Tomić Neven.

- Iz Nove hrvatske inicijative - Hrvatske kršćanske demokratske unija

Ivo Lozančić.

- Iz Demokratske narodne zajednice BiH

Đedović Ibrahim.

2. Sa teritorije Republike Srpske

-Iz Koalicije za cjelovitu i demokratsku Bosnu i Hercegovinu:

Bećirbašić Smail, Munira Karić, Malkić Abdurahman.

- Iz Socijaldemokratske partije BiH:

- Iz Spske radikalne stranke Republike Srpske

Balta Radenka, Mirković Dragan.

- Iz Radikalne stranke Republike Srpske

Deretić Miodrag.

- Iz Koalicije "Sloga"

Bošnjak Milenka, Dokić Branko, Jovanović Branislava, Rakić Vito.

- Iz Srpske demokratske stranke

Banjac Mirko, Perkanović Mara, Rađević Desanka, Špirić Nikola.

U zaključku izvještaja, Alma Čolo je naglasila da su svi članovi Verifikacione komisije jedinstvenog stava da se predloži verifikacija mandata svim navedenim poslanicima, osim poslanika iz DNZ BiH Đedović Ibrahima. Naime, četiri člana Verifikacione komisije predlažu verifikaciju mandata i Đedović Ibrahimu. Predstavnik Koalicije za cjelovitu i demokratsku Bosnu i Hercegovinu predlaže da se odgodi verifikacija mandata Đedović Ibrahimu do pribavljanja potrebne dokumentacije i stavova relevantnih domaćih i međunarodnih institucija obrazlažući to činjenicom da je Đedović Ibrahim procesuiran pod optužbom kršenja međunarodnog humanitarnog prava i prvostepeno osuđen na kaznu zatvora u trajanju od 10 godina.

Nakon što su poslanici saslušali izvještaj Verifikacione komisije otvorena je rasprava u kojoj su učestvovali: Nikola Špirić, Halid Genjac, Zlatko Lagumdžija, Sejfudin Tokić, Haris Silajdžić i Alma Čolo.

Poslije završene rasprave većina poslanika se izjasnila za glasanje o verifikaciji mandata svim poslanicima.

Prilikom glasanja, ukupno se 23 poslanika izjasnilo za verifikaciju mandata svim poslanicima (17 poslanika sa teritorija FBiH i 6 poslanika sa teritorija RS).

Predsjedavajući je konstatovao da je Predstavnički dom kvalificiranom većinom donio **odluku o verifikaciji mandata svim poslanicima**, prema spisku navedenom u izvještaju Verifikacione komisije.

AD-3

Davanje svečane izjave

Prije pristupanja činu davanja svečane izjave, predsjedavajući je napomenuo da je tekst izjave ranije usaglašen i da su identičan tekst svečane izjave pročitali i potpisali članovi Predsjedništva prilikom inauguracije Predsjedništva Bosne i Hercegovine.

Poslanik Mirko Banjac je predložio slijedeću izmjenu teksta: iza riječi "savjesno" da se dodaju riječi "...i odgovorno obavljati dužnosti koje su mi dodijeljene, kao poslaniku iz Republike Srpske/Federacije Bosne i Hercegovine..."

Nakon kraće rasprave, jednoglasno je zaključeno da se sugestije i primjedbe u pogledu izmjene teksta svečane izjave, dostave Kolegiju Predstavničkog doma radi predstojećeg usaglašavanja konačnog teksta izjave koji bi bio primjenjivan u svim državnim institucijama.

AD-4

Izbor predsjedavajućeg i zamjenika predsjedavajućeg Predstavničkog doma Parlamentarne skupštine Bosne i Hercegovine

Predsjedavajući je upoznao poslanike da je na sastanku predstavnika parlamentarnih stranaka, a u skladu sa Privremenim poslovnikom o radu Predstavničkog doma, usaglašen redoslijed zamjene predsjedavajućih: prvu trećinu dvogodišnjeg mandata predsjedavat će Bošnjak, drugu trećinu mandata Srbin, a treću trećinu mandata predsjedavao bi Hrvat.

Nakon toga predsjedavajući je pozvao poslanike da iznesu prijedloge kandidata za predsjedavajuće Predstavničkog doma.

Ispred Kluba poslanika Koalicije CD BiH za predsjedavajućeg iz reda bošnjačkog naroda predložen je Halid Genjac.

Ispred Kluba poslanika HDZ za predsjedavajućeg iz reda hrvatskog naroda predložen je Pero Skopljak.

Ispred grupe stranaka -SDP BiH, SD BiH, NHI-HKDU za predsjedavajućeg iz reda bošnjačkog naroda predložen je Sejfudin Tokić, a za predsjedavajućeg iz reda hrvatskog naroda predložen je Ivo Mijačević.

Ispred grupe stranaka Alijansa- SDS-a, SRS RS, Koalicija "Sloga" i Radikalne stranke RS - za predsjedavajućeg iz reda srpskog naroda predložen je Mirko Banjac.

Poslanici Ibrahim Spahić i Ivo Divković su predložili da se izbor između predloženih kandidata izvrši tajnim glasanjem. **Za** prijedlog se izjasnilo 16 poslanika, 22 poslanika su bila **uzdržana** i prema tome prijedlog nije usvojen jer nije dobio potrebnu kvalificiranu većinu.

Zatim se prešlo na glasanje o predloženim kandidatima:

-kandidat Halid Genjac: 20 poslanika **za**, 3 poslanika **protiv**, 7 poslanika **uzdržano**. Prijedlog je dobio potrebnu većinu glasova ali ne i potrebni broj glasova po entitetima (sa teritorija RS 3 poslanika su glasala **za**). Prema tome prijedlog nije usvojen.

-kandidat Sejfudin Tokić: 17 poslanika se izjasnilo **za**, 6 poslanika **protiv**, 12 poslanika **uzdržano**. Prijedlog nije dobio potrebnu većinu glasova.

-kandidat Pero Skopljak: 17 poslanika se izjasnilo **za**, 22 poslanika **uzdržano**. Prijedlog nije dobio potrebnu većinu glasova.

-kandidat Ivo Mijačević: 7 poslanika se izjasnilo **za**, 30 poslanika **uzdržano**. Prijedlog nije dobio potrebnu većinu glasova.

-kandidat Mirko Banjac: 16 poslanika se izjasnilo **za**, 22 poslanika **uzdržano**. Prijedlog nije dobio potrebnu većinu glasova.

Predsjedavajući je konstatovao da niti jedan od predloženih kandidata nije dobio potrebnu kvalificiranu većinu i prema tome nisu izabrani predsjedavajući Predstavničkog doma.

Usljedila je diskusija u kojoj su učestvovali: Branko Dokić, Halid Genjac, Nikola Špirić, Sejfudin Tokić, Ibrahim Spahić, Neven Tomić i Zlatko Lagumdžija.

Prema prijedlogu koji se ponavljao tokom diskusije, predsjedavajući je proglasio pauzu radi konsultacija među klubovima poslanika.

Nakon pauze predsjedavajući je obavijestio poslanike da su potrebne dodatne konsultacije i predložio nastavak sjednice kroz sedam dana. Prihvatanjem ovog prijedloga, prvi dio konstituirajuće sjednice Predstavničkog doma završio je sa radom u 17,50 sati.

**NASTAVAK PRVE KONSTITUIRAJUĆE SJEDNICE
PREDSTAVNIČKOG DOMA PARLAMENTARNE SKUPŠTINE
BOSNHE I HRCEGOVINE,
ODRŽANE 3. DECEMBRA 1988. GODINE**

Nastavak Sjednice sa početkom u 12,35 sati.

Predsjedavajući je konstatovao da ovom dijelu Prve sjednice prisustvuje ukupno 39 poslanika (25 sa teritorije FBiH i 14 sa teritorije RS), te da prema tome postoji kvorum za pravovaljano odlučivanje.

Podsjetio je da se nastavlja sa radom u okviru 4. tačke dnevnog reda i izražavajući očekivanje da su klubovi poslanika izvršili potrebne konsultacije predložio da se pristupi ponovnom predlaganju kandidata za predsjedavajuće Predstavničkog doma.

Prije iznošenja prijedloga kandidata, obavljen je čin davanja svećne izjave poslanika Medihe Filipović i Edhema Bičakčića koji nisu prisustvovali prvom dijelu konstituirajuće sjednice.

Nakon toga, Klubovi poslanika odnosno predstavnici stranaka obnovili su istovjetne prijedloge kandidata za predsjedavajuće Predstavničkog doma.

Poslanik Suada Muminagić ponovila je ranije neusvojen prijedlog da se izbor predsjedavajućih izvrši tajnim glasanjem. Prijedlog je stavljen na glasanje i nije dobio potrebnu većinu (7 poslanika **za**, 22 poslanika **protiv**).

Zatim se prešlo na glasanje o predloženim kandidatima:.

- kandidat Halid Genjac: 31 poslanik **za** (17 sa teritorija FBiH i 14 sa teritorija RS). Prijedlog je dobio potrebnu kvalificiranu većinu glasova.

- kandidat Sejfudin Tokić: 7 poslanika se izjasnilo **za**, 32 poslanika **uzdržana**. Prijedlog nije dobio potrebnu većinu glasova.

- kandidat Pero Skopljak: 16 poslanika se izjasnilo **za**, 8 poslanika **protiv**, 14 poslanika **uzdržano**. Prijedlog nije dobio potrebnu većinu glasova.

- kandidat Ivo Mijačević: 9 poslanika se izjasnilo **za**, 5 poslanika **protiv**, 24 poslanika **uzdržano**. Prijedlog nije dobio potrebnu većinu glasova.

- kandidat Mirko Banjac: 31 poslanik se izjasnio **za** (17 sa teritorija FBiH i 14 sa teritorija RS) Prijedlog je dobio potrebnu kvalificiranu većinu glasova.

Predsjedavajući je konstatovao da su prema rezultatima glasanja, ostvarenom kvalificiranom većinom uz potrebnu entitetsku zastupljenost glasova, **za predsjedavajuće Predstavničkog doma Parlamentarne skupštine Bosne i Hercegovine izabrani Halid Genjac i Mirko Banjac.**

Na traženje Kluba poslanika HDZ-a, predsjedavajući je proglasio pauzu.

Nakon pauze, poslanik Havel Ana, predstavnik Kluba poslanika HDZ-a je obavijestila Predstavnički dom da ostaju pri prvobitnom prijedlogu kandidata za predsjedavajućeg iz reda hrvatskog naroda.

Poslanik Mirko Banjac se zahvalio na izboru i predložio da Predstavnički dom donese zaključak kojim se osuđuje postojanje tajnih spiskova optuženih za kršenje međunarodnog humanitarnog prava pred Međunarodnim tribunalom u Hagu. Kao povod ovom prijedlogu, poslanik Banjac je naveo jučerašnje hapšenje srpskog generala na osnovu tajne optužnice.

Predsjedavajući je upozorio da Parlamentarna skupština BiH nema ingerencije na osnovu kojih bi uticala na način rada Međunarodnog tribunala u Hagu. Nakon toga se otvorila rasprava u kojoj su učestvovali poslanici: Haris Silajdžić, Zlatko Lagumdžija, Sejfudin Tokić, Miodrag Deretić, Desanka Rađević, Mediha Filipović, Neven Tomić, Abdurahman Malkić, i Edhem Bičakčić.

U vezi priprema za Madridsku konferenciju u diskusiji su učestvovali poslanici: Ivo Lozančić, Hilmo Neimarlija, Haris Silajdžić, Neven Tomić, Suada Miminagić, Branko Dokić.

Većina diskutanata je predložila da se naredna sjednica Predstavničkog doma zakaže kroz sedam dana sa posebnom tačkom dnevnog reda u okviru koje bi se razmatrale pripreme za Madridsku konferenciju. Prijedlog je prihvaćen uz zaključak da se Vijeću ministara Bosne i Hercegovine uputi zahtjev da do naredne sjednice Predstavničkog doma pripremi izvještaj o dosadašnjim pripremama za Madridsku konferenciju.

Rad drugog dijela Konstituirajuće sjednice Predstavničkog doma završen je u 15,50 sati.

Magnetofonski snimak čini sastavni dio ovog zapisnika.

Predsjedavajući Predstavničkog doma
Parlamentarne skupštine BiH
Halid Genjac, s.r.